

## I. DISPOSICIÓNS XERAIS

### XEFATURA DO ESTADO

**6271** *Lei 6/2013, do 11 de xuño, de modificación da Lei 32/2007, do 7 de novembro, para o coidado dos animais na súa explotación, transporte, experimentación e sacrificio.*

JUAN CARLOS I

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei.

#### PREÁMBULO

##### I

O benestar dos animais acaparou unha importancia crecente nos últimos anos e tivo un fito especialmente relevante no dereito español coa regulación, mediante unha norma básica, da Lei 32/2007, do 7 de novembro, para o coidado dos animais na súa explotación, transporte, experimentación e sacrificio.

Este instrumento legislativo estableceu un conxunto de principios sobre o coidado dos animais e a regulación do correspondente réxime sancionador en caso de incumprimento da normativa de benestar animal, en materias específicas como a protección dos animais de produción nas propias explotacións gandeiras, durante aquelas operacións relacionadas co transporte e o sacrificio ou matanza, así como a protección de determinados animais utilizados para experimentación e outros fins científicos e educativos.

##### II

O artigo 13 do Tratado de funcionamento da Unión Europea (TFUE) establece que «ao formular e aplicar as políticas da Unión en materia de agricultura, pesca, transporte, mercado interior, investigación e desenvolvemento tecnolóxico e espazo, a Unión e os Estados membros terán plenamente en conta as exigencias en materia de benestar dos animais como seres sensibles, respectando asemade as disposicións legais ou administrativas e os costumes dos Estados membros relativos, en particular, a ritos relixiosos, tradicións culturais e patrimonio rexional».

No seu momento a Lei 32/2007, do 7 de novembro, supuxo o acatamento do mandato comunitario que, con igual propósito, se foi implantando na Unión Europea estes últimos anos a través dos seus propios instrumentos.

Non obstante, desde entón evolucionouse nos métodos e coñecementos científicos sobre os factores que inflúen no benestar dos animais e na súa capacidade de sentir e expresar dor, sufrimento, angustia e dano duradeiro. Para dar resposta a estes avances e proseguir no proceso de harmonización da lexislación sobre a utilización de animais para fins científicos, a Unión Europea publicou a Directiva 2010/63/UE do Parlamento Europeo e do Consello, do 22 de setembro de 2010, relativa á protección dos animais utilizados para fins científicos.

Na citada directiva maniféstase a necesidade de preservar o benestar dos animais sometidos a procedementos científicos elevando os seus niveis mínimos de protección, de acordo co progreso técnico e científico máis recente. É por isto polo que se inclúen no ámbito de aplicación da dita directiva os «invertebrados tales como os cefalópodos e

determinadas formas fetais de mamíferos», por tratarse de seres sobre os cales actualmente se puido demostrar a súa capacidade para experimentar dor, sufrimento, angustia e dano duradeiro.

Cando se implemente a directiva no regulamento de desenvolvemento da presente lei, asegurárase que o uso de animais para fins científicos ou educativos debe considerarse unicamente cando non exista outra alternativa e que as avaliacións exhaustivas dos proxectos, que deben ter en conta consideracións éticas no uso dos animais, constitúen o fundamento da autorización dos proxectos e deben garantir a aplicación dos principios de substitución, redución e refinamento neles.

Procede, por tanto, modificar en consecuencia catro artigos da Lei 32/2007, do 7 de novembro, para adaptala á evolución dos coñecementos en materia de benestar dos animais, tanto no referente ao seu ámbito de aplicación como na supresión de certas definicións, elevando con isto os niveis mínimos de protección dos animais, que se encontran xa ou se poidan establecer nos termos da normativa comunitaria e internacional, e canalizando o progreso dos ditos coñecementos da maneira máis racional. Inclúese ademais unha mención expresa á aplicación da normativa da Unión Europea aos procedementos e proxectos, que deben ser regulados, avaliados e autorizados nos termos establecidos nela. Así mesmo, e co fin de proporcionar un claro cumprimento da normativa comunitaria, que exige resolución expresa, establécese o sentido desestimatorio do silencio administrativo na autorización dos proxectos.

En definitiva, mediante tales modificacións esta lei sae ao paso dunha distorsión detectada na actualidade en relación co ámbito de aplicación da Directiva 2010/63/UE do Parlamento Europeo e do Consello, do 22 de setembro de 2010, e a lexislación nacional, no que respecta á categorización dos animais utilizados para experimentación e outros fins científicos ou educativos, e de resolución expresa das solicitudes de autorización dos proxectos.

**Artigo único.** *Modificación da Lei 32/2007, do 7 de novembro, para o coidado dos animais na súa explotación, transporte, experimentación e sacrificio.*

A Lei 32/2007, do 7 de novembro, para o coidado dos animais na súa explotación, transporte, experimentación e sacrificio, modifícase nos seguintes termos:

Un. O número 1 do artigo 2 queda redactado do seguinte modo:

«1. Esta lei aplicarase:

a) Aos animais vertebrados de produción.

b) Aos animais, proxectos e procedementos recollidos na normativa da Unión Europea ou internacional na materia de animais utilizados con fins de experimentación ou outros fins científicos, incluíndo a educación e a docencia.»

Dous. As definicións das letras b), c) e d) do artigo 3, relativas a animais utilizados para experimentación e outros fins científicos, procedemento, e experimentación e outros fins científicos, incluída a docencia, quedan sen contido.

Tres. O artigo sete queda redactado do seguinte modo:

«Artigo 7. *Centros ou establecementos destinados á cría, subministración ou uso de animais utilizados para experimentación e outros fins científicos, incluída a docencia.*

Os centros ou establecementos destinados á cría, subministración ou uso de animais utilizados para experimentación e outros fins científicos, incluída a docencia, deben estar autorizados ou inscritos no correspondente rexistro administrativo, con carácter previo ao inicio da súa actividade, e os procedementos e proxectos onde se utilizan deben ser regulados, avaliados e autorizados nos termos en que se determine na normativa da Unión Europea.»

Catro. O artigo 14 modifícase como segue:

Un. O número 1 modifícase da seguinte maneira:

a) A letra b) substitúese pola seguinte:

«b) O incumprimento das obrigas exixidas polas normas de protección animal, cando concorra a intención de provocar a súa tortura ou morte.»

b) A letra f) substitúese pola seguinte:

«f) Utilizar en procedementos animais prohibidos, ou iniciar ou levar a cabo un procedemento sen a autorización previa ou a avaliación favorable previa en caso de silencio administrativo, do proxecto correspondente.»

c) Engádesse unha nova letra k), con este contido:

«k) Iniciar ou levar a cabo procedementos en condicións distintas das incluídas na autorización do proxecto, ou na súa avaliación favorable en caso de silencio administrativo, ou incumprindo os requisitos, condicións e obrigas contidos na autorización ou avaliación favorable, cando se utilicen nos ditos procedementos primates non humanos, animais de especies ameazadas incluídas no anexo A do Regulamento (CE) n.º 338/97 do Consello, do 9 de decembro de 1996, relativo á protección de especies da fauna e flora silvestres mediante o control do seu comercio, animais capturados na natureza, animais vagabundos ou asilvestrados.»

Dous. O ordinal segundo modifícase da seguinte maneira:

a) A letra b) substitúese pola seguinte:

«b) Iniciar ou levar a cabo procedementos en condicións distintas das incluídas na autorización do proxecto, ou na súa avaliación favorable en caso de silencio administrativo, ou incumprindo os requisitos, condicións e obrigas contidos na dita autorización ou avaliación favorable, cando non constitúa infracción moi grave.»

b) A letra d) substitúese pola seguinte:

«d) O incumprimento das obrigas exixidas polas normas de protección animal, cando produza lesións permanentes, deformacións ou defectos graves.»

c) Engádesse unha nova letra f), con este contido:

«f) Emitir unha avaliación favorable un órgano habilitado para isto, para un proxecto, incumprindo a normativa reguladora en canto aos requisitos de conflito de intereses ou permitindo o uso de animais prohibidos en procedementos, ou en condicións distintas ás requiridas para os autorizados.»

Cinco. Engádesse unha disposición adicional terceira, co seguinte contido:

«Disposición adicional terceira. *Silencio administrativo.*

En cumprimento do previsto no artigo 43 da Lei 30/1992, do 26 de novembro, de réxime xurídico das administracións públicas e do procedemento administrativo común, no procedemento de autorización de proxectos en que se utilicen animais para experimentación e outros fins científicos, incluída a docencia, o vencemento do prazo máximo para resolver sen terse notificado resolución expresa ao interesado entenderase como silencio administrativo negativo, salvo que este conte xa coa preceptiva avaliación favorable, a partir de cuxo momento o silencio se entenderá positivo.»

Seis. Substitúese a disposición derradeira sexta pola seguinte:

«Disposición derradeira sexta. *Facultade de aplicación e desenvolvemento.*

Autorízase o Goberno, no ámbito das competencias do Estado, para ditar cantas disposicións sexan precisas para a aplicación e o desenvolvemento desta lei e, en particular, para concretar o réxime de infraccións e sancións disposto nesta lei.»

Sete. A disposición derradeira sexta pasa a ser disposición derradeira sétima.

Disposición derradeira primeira. *Incorporación de dereito europeo.*

Mediante esta lei habilítase a incorporación ao dereito español da Directiva 2010/63/UE do Parlamento Europeo e do Consello, do 22 de setembro de 2010, relativa á protección dos animais utilizados para fins científicos.

Disposición derradeira segunda. *Entrada en vigor.*

Esta lei entrará en vigor o día seguinte ao da súa publicación no «Boletín Oficial del Estado».

Por tanto,  
Mando a todos os españois, particulares e autoridades, que cumpran e fagan cumprir esta lei.

Madrid, 11 de xuño de 2013.

JUAN CARLOS R.

O presidente do Goberno,  
MARIANO RAJOY BREY